

Penyampai : DATO' SERI DR SITI HASMAH BINTI HAJI MOHD ALI  
Tajuk : MAJLIS PENUTUPAN KEMPEN HARI PAHLAWAN  
Lokasi : HOTEL MIDA, KUALA LUMPUR  
Tarikh : 21-02-2000

Bersyukur kita ke hadrat Allah Subhanahu wa Ta'ala kerana dengan limpah kurnia dan izinNya telah dapat kita hadir di Majlis Jasamu Dikenang Kempen Hari Pahlawan 1999 anjuran Persatuan Bekas Tentera Malaysia (PBTM).

Saya juga mengucapkan berbilang-bilang terima kasih kepada PBTM kerana mengundang saya ke majlis ini yang bertujuan untuk memberikan penghargaan kepada para dermawan yang telah bermurah hati menyumbang kepada Tabung Kempen Hari Pahlawan dan untuk menyampaikan bantuan kebajikan kepada mereka yang memerlukan.

2. Walaupun keadaan ekonomi negara di dalam kesulitan, namun ada juga insan, walaupun telah turut terjejas sama dengan keadaan ini, dengan penuh ikhlas dan keinsafan telah juga menghulurkan sumbangan kepada Tabung ini.

3. Bagi tahun 1999, kita telah berjaya mengumpulkan kutipan Hari Pahlawan sebanyak RM916,484.92 (Ringgit Malaysia Sembilan Ratus Enam Belas Ribu Empat Ratus Puluh Empat Dan Sen Sembilan Puluh Dua). Pecahan kutipan mengikut negeri adalah seperti berikut:

- a. Ibu Pejabat PBTM - RM 345,569.24
- b. Bhg. Negeri Johor - RM 31,829.91
- c. Bhg. Negeri Kelantan - RM 71,682.34
- d. Bhg. Negeri N. Sembilan - RM 24,386.98
- e. Bhg. Negeri Pahang - RM 30,000.00
- f. Bhg. Negeri Perak - RM 88,835.70
- g. Bhg. Negeri Perlis - RM 24,129.36
- h. Bhg. Negeri P.Pinang - RM 111,152.45
- i. Bhg. Negeri Selangor - RM 44,925.64
- j. Bhg. Negeri Sabah - RM 28,742.54
- k. Bhg. Negeri Trengganu - RM 32,256.90
- l. Bhg. Negeri W. Persekutuan - RM 82,946.86

JUMLAH KESELURUHAN : RM916,484.92 (Bahagian Negeri Melaka dan Sarawak tiada kutipan sementara Bahagian Negeri Kedah pengesahan belum diperolehi daripada Setiausaha Kerajaan Negeri Kedah)

4. Dengan penuh rasa kesyukuran, saya merakamkan ucapan terima kasih di atas keikhlasan dermawan-dermawan yang telah menyumbang untuk mengisi Tabung Kempen hari Pahlawan. Saya percaya, usaha yang telah mereka lakukan ini telah menunjukkan sifat kesedaran dan keinsafan yang tinggi di dalam diri mereka, bagi menunjukkan kasih sayang dan mengenang budi terhadap mereka-mereka yang berkorban dan terkorban di dalam perjuangan mempertahankan tanah air tercinta.

5. Kepada penyumbang-penyumbang perseorangan dan yang mewakili Kementerian-Kementerian, agensi-agensi Kerajaan dan pihak swasta, usaha murni ini amatlah kita hargai. Saya percaya walaupun organisasi tersebut terjejas dengan kegawatan ekonomi semasa, namun mereka tetap juga menghulurkan sumbangan. Mereka berbuat demikian, kerana hati dan nurani mereka telahpun disemai dengan sifat- sifat yang mulia. Mereka juga memang telahpun sedia maklum bahawa keamanan, kemakmuran dan keharmonian negara yang kita kecapai sekarang adalah hasil dari keringat dan tumpahan darah para pahlawan yang lalu.

6. Mereka yang telah kecundang di medan perjuangan telah meninggalkan balu dan anak-anak yang amat memerlukan bantuan. Manakala mereka yang tercedera dan cacat, tidaklah adil jika melihat kemakmuran negara hanya dinikmati oleh mereka yang berupaya sahaja. Adalah menjadi tanggungjawab kita rakyat Malaysia, untuk membela nasib mereka pula. Pembelaan dan bantuan yang mereka perlukan bukanlah sekadar merakamkan penghargaan, kerana itu sahaja tidak akan dapat membantu keadaan mereka. Oleh itu sumbangan yang anda semua hulurkan itu adalah amat besar ertinya kepada mereka.

7. Di atas keprihatinan para dermawan sekalian, dan mereka yang telah mengusahakan untuk mendapatkan sumbangan, kami semua amatlah terhutang budi dan mengucapkan jutaan terima kasih. Kami berdoa semoga kehidupan anda semua dilimpahi rahmat dan rezeki Allah di muka bumi ini dan akan mendapat balasan kebaikan di akhirat kelak. Insya-Allah.

8. Akhir sekali saya berdoa semoga Allah Subhanahu wa Ta'ala memberkati majlis ini.

Sekian, wabillahitaufik walhidayah wassalamualaikum warahmatullahi wabarakatuh.

\*\*\*\*